

青州府志卷四十三

傳二之六

人物傳六

明

崔迪字惟吉益都人世習儒業通經史精於理學太祖微時嘗至其家迪敬禮焉洪武初召授青州儒學訓導轉益都教諭擢左春坊左贊善謝病歸乞以教諭終其身賜之誥命白金文綺龍頭杖一品服以寵異之

尼養德益都人洪武初由儒士舉爲永年教諭倡明理學啟迪後進士皆宗式之弟養性舉眞定訓導克有師範與

青州府志卷四十三

兄齊名時人擬之二程兄弟云

張謙臨朐人邃於理學洪武初以薦授夏縣教諭卒葬於夏弟子慕其道義如哭私親見夏縣志

臧哲諸城人洪武初以儒士舉爲本縣訓導徵授禮部主事轉兵馬司指揮發姦摘伏不避權豪太祖嘉之擢刑部員外郎累官至四川左參政廣西布政使所至以廉介稱母憂家居洪武十一年賜米鈔敕曰卿曩知桂林歲月未久雖有酒失而廉介自持邇以母憂去職守服至今朕嘗軫念特遣人賜卿米六十石鈔二十五錠以給所乏卿當恪恭已孝服闋來朝共圖至治語具明太祖實錄明一統

志

欽定古今圖書集成皆有傳

溥衡臨淄人不知所以進洪武中任平陸典史以績最升御史其事不詳見山西通志

楊辛高苑人歲貢洪武中授臨漳知縣漳水溢城圯辛爲巨筏數百移民於高阜全活甚衆水患旣息民相率詣縣拜曰吾民得活者公之力也辛曰禦民之患吾分內事何以謝爲後徙縣治建學校皆其規畫民利而思之祀臨漳名宦祠

張志善昌樂人洪武中以功充錦衣衛將軍永樂十四年

青州府志卷四十三

二

征交趾多著奇功沒於陣蔭卹有加

孫浩諸城人太學生洪武中以薦授廣西參議降姚州知州累升江西參政廣東布政使縣志稱其政績著聞而不詳其事子蕃永樂二十一年舉人署汝陽訓導持身謹飭教士不倦擢陝西道監察御史卒於官又王雲字天章宏治間進士授刑部主事執法不撓歷仕至平涼府知府丁母憂起補嚴州罷浩明一統志有傳

王克剛臨淄人不知所以進洪武間爲將樂知縣持身廉潔悉民疾苦吏不敢欺由是民獲力農見延平府志

許信臨朐人歲貢洪武間以薦授江西道御史廷對皆切

中當世要務奉命巡雲南又巡江西所至貪墨多望風解  
綬去

周璿諸城人洪武間以薦爲天策衛知事先是內外諸衛  
設經歷知事各一人後汰經歷惟留知事而印章與所署  
司名如故三十一年璿言宜罷知事而復經歷庶使官制  
有常名實不戾太祖從之旋擢左僉都御史建文中戮力  
戰守及燕王稱帝璿見 不屈死妻王氏子蠻兒皆繫獄  
福王時追贈左副都御史謚肅愍又謝昇明史云諸城人

傳惟鱗明書  
云沛縣人

建文時御史練兵給餉夙夜勤勞燕王八不

屈死父旺子咬住

江南通志  
作子咬

戍金齒妻韓氏四女並發教

青州府志卷四十三

三

坊司福王時謚貞勤贈太僕卿

張伯裕諸城人洪武間舉賢良方正授潼關知縣以鯁直  
不阿謫安順州吏目因家焉見貴州通志名宦傳

孫企賢諸城人洪武十五年以人材薦授林縣知縣剛介  
有爲吏民畏服建文二年以誣逮罷歸永樂二年上察知  
其賢行取赴京自陳衰老賜宴以舊官致仕

董興諸城人年高好義洪武十八年知縣朱允恭爲諸司  
註誤罷官興率衆詣闕奏保情辭懇惻太祖嘉異之遣使  
勞允恭仍令復職

邢潤諸城人洪武二十一年進士授刑科給事中以直諫

死

欽定古今圖書集成有傳

仇經高苑人洪武二十四年以主簿王文禮薦爲本縣訓導升開封太原府知府以廉能授河南道御史永樂初坐言事謫常山知縣愷弟愛民九載卒

欽定古今圖書集成有傳

徐成兒諸城人母年八十寢疾幾死成兒焚香顛天請以身代三日母愈耆老呂興等舉其孝行以聞洪武二十四年春徵至京賜鈔十錠遣還見明高廟實錄

王讓字秉遜益都人洪武二十九年舉人性至孝嘗廬墓

致湧泉之應授國子監學錄施教以孝弟爲先永樂中簡侍皇太孫讀書首陳堯舜之道惟在孝弟人主躬行孝弟則天下咸化不勞而治同時陳山張瑛以順旨被寵戴綸林長茂則強諫不少詭隨惟讓謙卑自牧簡默慎言每進規諫亦委曲切中事情太孫斂容聽之益加禮焉及扈從北行常被召見厚加賜予洪熙初太孫正位東宮進左春坊庶子未幾宣宗卽位遷吏部左侍郎

張俊益都人洪武三十年進士授河南汲縣知縣首重農事時巡行阡陌間自督課之賦役親驗版籍務得其平吏胥皆斂手不敢爲姦暇則綜理學校以厲生徒去後人猶

思之子堯封字子華生員性孝友好周人之急堯封子曉別有傳

王禮諸城人歲貢洪武末授滿城知縣性耿介莅政以嚴待士以禮持躬廉約日食蔬糲治聲大著見畿輔通志及保定府志

孔復字士享博興人不知所以進永樂初爲御史以直聞出爲九江府知府有循聲清案牘闢田野民用饒富九江府志稱其宅心仁厚廉公有威云

焦瑾字良玉諸城人幼聰敏力學器識過人父若霖永樂初以人材徵至京師思親成疾瑾方弱冠卽慨然陳情乞

代成祖許之明年授瑾濬縣稅課大使署縣事甚得民心秩滿濬人相率詣闕保升濬縣知縣措置有方豪猾斂迹後補贊皇考滿濬與贊皇之民上書爭留之朝廷方以黃巖難治特予六品奉俾知黃巖有麥秀雙岐孕生三男虎不入境之異景泰五年罷歸黃巖之民肖像賦詩羣至其家問安否逾年卒同時又有徐英由吏員授刑部員外郎執法不撓高秀由薦辟授山西按察司副使降順德府同知所至有聲

趙銓字景衡壽光人貢生永樂中授溧陽知縣在事九年政通人和成祖召至闕下賜衣一襲珊瑚一株寶鈔萬貫

歷官紹興府知府

劉甄字宗器壽光人永樂三年舉人歷仕至監察御史剛果有爲終山西按察司副使其事不詳弟昺字宗曦通經史善詩不求仕進知縣張贊李儀等薦之固辭不起自號松溪居士教子有義方時人比之竇十郎成化間曾聘至闕下辭不受職年九十二而終所著有松溪詩稿明一統志有傳昺子珣別有傳

曹晟昌樂人永樂六年舉人擢禮科給事中時大難方平權貴用事晟正色立朝彈劾無所避朝士憚之

柴玘昌樂人永樂九年舉人器宇俊偉博學善屬文爲監

青州府志卷四十三

六

察御史敢言直諫不避權貴

欽定古今圖書集成有傳

高俊昌樂人永樂九年舉人志行純正不事浮華與柴玘知名當時任鎮遠府經歷

馬驥字良德安邱人永樂十三年舉人授廬江知縣威德並行邑內稱治九載去民思之立遺愛碑見廬州府志

李幹高苑人永樂十五年舉人鄆州學正事親色養盡孝母歿廬墓三年子侃南城兵馬司指揮亦廬幹墓三年

劉貞字崇正昌樂人永樂十五年舉人聰明好學初任鞏昌府徽州判官丁父憂起復補永平府灤州州判既而以

母憂歸服闋赴部會貴州用兵以貞候選官督催餉事  
竣改任景州歷仕三州清慎如一

孫整樂安人永樂十八年舉人授直隸威縣教諭父卒哀  
毀骨立廬墓終喪繼而祖母歿復爲父廬墓三年有司以  
孝聞建坊旌表

張敬益都人永樂二十一年舉人授成安教諭歷灤城鄜  
州二十餘年謝職歸郡邑敦請教誨諸生年逾八十神明  
不衰人爭師之

徐弼字良輔益都人性易直舊志稱其遊太學授戶部主  
事員外郎比參大藩持守勤介奉敕除閩叛賊勲績爛如

青州府志卷四十三

七

而不詳其事又云當南北戒嚴弼挺然無難色事竣得譽  
寂然無驕容處世立身卓卓如此

馬愉字性和臨朐人宣德二年進士以一甲第一人授翰  
林院修撰九年秋特簡史官及庶吉士進學文淵閣以愉  
爲首正統元年以楊士奇薦與苗衷高穀曹鼐直經筵  
進侍讀豫修宣宗實錄成晉侍讀學士五年詔以本官入  
內閣參預機務尋晉禮部右侍郎十二年卒贈尚書兼學  
士贈官兼職自愉始愉以文學受知兩朝端重簡默門無  
私謁論事務寬厚嘗奏天下獄久者多瘐死宜簡使者分  
道決遣帝納焉會有邊警而別部使至衆皆議執之愉言

賞善罰惡爲治之本波及於善非法乘人之來執之不武帝然之厚遣其使著有澹軒集七卷別本澹軒集八卷四庫全書並存其目明史附見楊溥傳明一統志

欽定古今圖書集成皆有傳子徵別有傳

陳綸樂安人宣德間歲貢博涉羣書記問淹貫一時稱爲經師成均之士交重之舊志稱其訓導觀城卓然模範轉嚴州府照磨不久卽歸

韓俊壽光人曹欽等爲亂俊以總旗率五百人盡誅欽等世襲錦衣衛百戶事在宣德間

劉福字慶之益都人正統元年進士授戶科給事中上疏

青州府志卷四十三

八

言上皇還自瓦剌當復位不合時論外補山西參議遷山西參政以疾致仕廉正自持歷任三十餘年家無厚儲人咸重之

劉彧字著章益都人正統四年進士授工部主事歷郎中升彰德府知府舊志稱其持身正大約己愛民鄴人至今思之而不詳其事又云居鄉恂恂不見喜愠之色學問醇實有君子之稱

劉義字循道諸城人正統六年舉人景泰初授句容縣丞天順初升句容知縣除姦息訟養老勤民婚喪禁侈靡民皆化之晉賢令 超者舊有祠義歸民肖其像與超同祀



焉大學士李賢爲德政頌刻石於祠曾孫士則附譚章傳  
閻寬字德厚樂安人正統七年進士授監察御史正色立  
朝絕請託忤錦衣衛指揮馬順順銜之出按畿北再按湖  
廣墨吏多解綬去還朝爲怨者所中下錦衣獄順因文致  
之杖戍遼東鐵嶺寬裹創就道留子溥侍其父攜仲子江  
隨行居遼三年怡然自得溥亡以父左右無人憂憤成疾  
而卒喪歸其父亦卒

欽定古今圖書集成有傳江成化間進士戶部主事  
曹凱字宗元益都人正統十年進士授刑科給事中磊落  
多壯節英宗北征諫甚力帝不從乘輿果陷凱慟哭竟日

青州府志卷四十三

九

聲徹禁庭與王竑共擊馬順至死景泰中遷左給事中用  
薦擢浙江右參政在浙數年聲甚著初凱在諫垣嘗劾武  
清侯石亨亨得志修前憾遂謫凱衛經歷卒明史明一統  
志

欽定古今圖書集成皆有傳

張翰安邱人正統十年進士授廣東道監察御史時英宗  
北狩郟王監國翰與給事中王竑等言王振誤國之罪請  
籍沒其家因索振僕用事者毛某王某二人於郟王前毆  
殺之於是直聲動朝野後升江西左參議未幾致仕家居  
授徒講學室無環堵巡撫龔某者給官地俾築室以居貧

約恬靜至今鄉曲稱之

馮珍臨朐人父暹戶部郎中珍正統十二年舉人歷林縣  
靈石封邱三學教諭升順天府學教授爲人端方事母孝  
敦睦嫻族讀書力學毅然以興起斯文爲己任

劉珣字叔溫昺子正統十三年進士天順中歷右中允侍  
講東宮憲宗卽位以舊宮僚屢遷太常卿兼侍讀學士直  
經筵日講成化十年晉吏部左侍郎充講官如故珣每進  
講反覆開道詞氣侃侃聞者爲悚學士劉定之稱爲講官  
第一憲宗亦愛重之明年詔以本官兼翰林學士入文淵  
閣預幾務帝每呼東劉先生賜印章一文曰嘉猷贊翊尋

青州府志卷四十三

十

晉戶部尚書再加太子少保文淵閣大學士文華大訓成  
加太子太保晉謹身殿尋具疏乞休令馳驛歸珣初遭母  
憂廬墓三年比歸父歿復廬於墓宏治三年卒謚文和嘉  
靖初以言官請賜祠額曰昭賢仍遣官祭之珣有諫紫霞  
杯疏略曰臣等風聞近日內府有術士造紫霞杯者蓋紫  
霞杯以硫黃爲主本草云硫黃太熱有毒人之五臟柔脆  
祇宜平和不可餌此燥烈之物況金石之藥古人所忌硫  
黃硃砂此正金石之藥也皇上春秋鼎盛聖體方強臣等  
恐術士巧飾虛詞有以此杯進御一或用之其患非細臣  
子之心日夕憂惶伏望皇上念祖宗社稷之重萬幾之暇

清心寡欲靜以頤養則血氣自然周流可以無疾凡一切熱補之劑悉宜峻絕弗用醫書云人年五十以前不可服補藥是也乞將造杯之人斥逐於外無使出入內府熒惑衆聽臣等不勝惓惓納忠之至又有開言路疏略曰伏惟我太祖高皇帝臨御之時自公侯以及守令下至軍民匠役諸色人等皆得言事其言中理卽爲施行且或與之官給之賞言不中理亦置而不問蓋誘人使之言也猶恐人不得盡言再設登聞鼓於長安門外應有可言之事許至御前陳說所以廣耳目防壅蔽而通下情也故當是時雖閭閻之間細微之事無不周知天下太平良有所自洪惟

皇上嗣承大統卽詔天下凡軍民利病諸臣直言無隱臣有以見皇上之心卽太祖高皇帝求言圖治之心也夫何十數年來以言而行賞者固有之以言而得罪者亦不少夫古聖獎人使言人尚不敢况加人以罪而孰敢言哉卽今妖物傷人京城騷動人持兵刃晝眠夜作說者曰此陰盛之狀又曰此戎馬生郊之兆延今半月之久無一人敢言豈非顧望箝結於平時哉設若有甚於此亦孰敢言或得禍亂不言可知矣伏望皇上廓宇宙之量容涓滴之微詔六科給事中十三道監察御史及一應官吏軍民人等明言致災之由殄災之策不復忌諱皇上俯垂霽覽虛心

聽納如所言果中卽賜施行以興政治以厭羣望卽所言不中亦望姑容如是則言路開君子進小人退萬事何憂不理災害何憂不息哉所著有古直集十六卷四庫全書存其目明史明一統志

欽定古今圖書集成皆有傳子銳孫澄甫別有傳

吳鏞惠曾孫正統十一年輸粟一千二百石濟民敕建石坊顏其居曰尚義之門又馮友同時亦以振濟敕建義民坊

馬徵愉子七歲通孝經旣長博極羣書以蔭入太學授汜水知縣以清節自厲縣有與從母訟產者久不決徵至各

以千金爲壽皆卻之而均其財訟者感服去丁母憂歸王雄臨朐人正統七年輸粟一千二百石助振旌爲義民又路敬朱整正統十一年各輸粟一千五百石爲振皆得旌

謝景成諸城人業農好義正統十一年歲饑輸粟一千二百石助振有司以聞旌其門景泰五年又輸粟四百餘石賜其子聰冠帶又魏宗武正統間亦輸粟千二百石景泰間范宗華輸粟千五十石陸通輸粟千石皆旌爲義民黃甄壽光人景泰五年進士選庶吉士改工科給事中天順中陝西大水甄上疏振拯稱旨升都給事中成化三年

南京雷震午門正樓甄上疏修省語涉忌諱權璫夏時乘  
機中之降陝州知州十八年不調解組歸陝人德之祀名  
宦祠

欽定古今圖書集成有傳

劉璧字良玉壽光人景泰七年舉人授元城知縣三載考  
績元城人以水鑑斗衡詣吏部頌璧德擢廣西道監察御  
史

石瑛字文玉益都人由景泰選貢官山西澤州吏目早引  
歸性剛直不隨於俗家素豐歲歉施粥全活甚衆時疫大  
作死者藁葬不給施棺三百餘具以瘞之又嘗資人婚娶

青州府志卷四十三

十三

賴有後者數十家其少年不事生產者則擊以杖閭里恆  
愛慕而敬憚之

欽定古今圖書集成有傳子銘歲貢河間通判銘子存仁  
存禮存仁舉人某縣知縣存禮存仁子琚別有傳

臧翥字良器昌樂人天順三年舉人歷青田鄆城知縣舊  
志稱其行政平易深得吏民之心刻石紀其功德而不詳  
其事

劉章字煥文昌樂人天順六年貢生沈靜好學授行唐知  
縣舊志稱其清慎明威尤以德禮爲教而不詳其事

陳清字廉夫益都人父俊舉人交城教諭清天順八年進

士授戶部主事歷員外郎中擢山西左參政撫治鄖陽內  
升戶部侍郎陳言三十四事清理馬房冗費一十八萬以  
南工部尚書致仕子錫性恬澹不樂仕進以父蔭移子策  
隱居終身策以蔭當補官時冢宰清同年友也或諷一言  
清正色拒之其剛介如此

欽定古今圖書集成有傳

冀琮字廷璽益都人天順間歲貢授三合知縣母喪哀毀  
盡禮父喪廬墓三年有靈芝白兔及巢烏數千之異鄉人  
以爲孝感宏治間詔旌其門子九齡字子仁舉人華陰知  
縣教民以孝弟爲先父教也琮從子九皋九經別有傳